

15 OCT 2001

Agong-Pulih

YANG DI-PERTUAN AGONG BERANSUR PULIH DAN BERTERIMA KASIH KEPADA RAKYAT

SINGAPURA, 15 Okt (Bernama) -- Yang di-Pertuan Agong Sultan Salahuddin Abdul Aziz Shah, yang berada di sini untuk pembedahan kecil di Hospital Mount Elizabeth, hari ini merakamkan ucapan terima kasih kepada rakyat jelata di atas doa mereka semoga Seri Paduka segera pulih.

Seri Paduka bertitah kesihatannya semakin pulih selepas menjalani pembedahan selama dua jam pada 6 Okt untuk memasang alat "pacemaker".

"Saya bersyukur kepada Allah Tuhan, alhamdulillah, saya semakin pulih. Tak ada apa-apa hal, pembedahan berjalan dengan baik dan layanannya semua baik dan bagus. Puas hati saya.

"Sampaikan salam saya kepada rakyat Malaysia dan juga Selangor atas doa selamat untuk saya. Lama saya tak pernah sakit macam ini, hampir sebulan," titah Seri Paduka kepada wartawan Bernama dan RTM dalam pertemuan selama 20 minit, di hospital itu di sini.

Yang di-Pertuan Agong juga berterima kasih kepada Perdana Menteri Datuk Seri Dr Mahathir Mohamad kerana menziarahi Seri Paduka tiga kali sejak dirawat di hospital itu.

Seri Paduka, yang diiringi Permaisuri Agong Tuanku Siti Aishah, turut menerima banyak jambangan bunga dan beratus-ratus kad ucapan daripada rakyat Malaysia yang bekerja di Singapura.

Seri Paduka juga mengucapkan terima kasih kepada kerabat sultan dan pembesar negeri yang melawatnya di sini. Turut mengunjungi Seri Paduka ialah Sultan Brunei dan Presiden Singapura S.R.Nathan.

Seri Paduka kelihatan ceria walaupun pengerakannya agak perlahan ketika berjalan-jalan di luar wad buat kali ketiga sejak pembedahan kecil itu sambil bertanyakan keadaan kakitangan hospital berkenaan.

Semalam, Yang di-Pertuan Agong dibawa bersiar-siar dengan kereta selama sejam.

"Doakanlah saja saya baik, InsyaAllah, saya balik juga. Saya pun jemu di sini dah," titah Seri Paduka yang dijaga rapi oleh sepasukan 14 pakar perubatan termasuk tiga warga Malaysia.

Di dalam wad Seri Paduka, terdapat gambar cicinda pertamanya iaitu Tengku Syed Aqil Harryth, yang dilahirkan tiga bulan lepas kepada cucunda Seri Paduka, Tengku Syed Budriz Jamallulail.

Pakar perunding kardiologi Hospital Mount Elizabeth, Datuk Dr Richard Ng, berkata Seri Paduka berada dalam keadaan baik dan akan diawasi selama seminggu lagi.

Seri Paduka hari ini turut menerima kunjungan Pemangku Yang di-Pertuan Agong Sultan Mizan Zainal Abidin dan adinda Seri Paduka, Tengku Ampuan Bariah.

-- BERNAMA

TCL NAK